

LOCAL

Glenbert Croes a papia idioma cla

Si Fundacion Betico Croes no tin balor mas pa gobierno, MEP no tin razon mas pa existi

CUMANA - Glenbert Croes, yiu di difunto Betico Croes a dicidi di habri afo contra di MEP y gobiernu, mirando e desinteres pa cu Fundacion Betico Croes, cu ta pasando den momentonan dificil.

Si dirigientenan di MEP a bira lomba pa memoria di su tata, anto MEP no tin razon mas pa existi, maske cu ta Betico Croes a funda e partido aki, segun Glenbert Croes.

Despues di a recibí e informacion debido tocante e situacion di Fundacion Betico Croes, e como yiu mayor di Betico Croes a splica su punto di vista.

"Dia cu a surgi problemanan entre mr. Hendrik Croes y Jossy Mansur, mi mama, mi rumannan y mi persona a firma un carta pidiendo retiro di Jossy Mansur como presidente di

Fundacion Betico Croes, pa evita cu e fundacion, cu no tin nada di haber cu e problema, lo por worde afecta.

Dia cu mi persona a regresa Hulanda, mi a dicidi di bira miembro di Fundacion Betico Croes p'asina mi duna mi aporte na e esfuersonan pa mantene memoria di mi tata y su imagen na bida", asina Glenbert Croes ta splica.

Despues cu gobierno a ignora Fundacion Betico Croes pa hopi tempo, ora cu a yega e momento pa bai recorda e di 5 aña di fayecimento di Betico Croes, e mensahe a worde manda pa fundacion cu MEP lo por yuda nan, pero no por tin politiconan den Fundacion Betico Croes.

T'asina su persona a dicidi, cu si te mester sali pa gobierno of MEP yuda e fundacion cu ta carga e nomber di su tata, lo e sali pa go-

bierno no perhudica dicho institucion cu ta saliendo na vanguardia di e nomber, memoria y imagen di Betico Croes:

"Kico nos ta mira awor, gobierno di MEP no a yuda Fundacion Betico Croes. Banco kier pa e debe worde cancela, mientras cu fundacion no tin e manera pa paga. Ora nos pueblo pasa dilanti di Plaza cu ta carga nomber di mi tata, nos por ripara con gobiernu tin e plaza bandona. No ta fundacion tin e plaza bandona, ta gobiernu.

Nunca gobiernu kier a duna e fundacion e maneho p'asina nan cuida e plaza y e estatua di mi tata, pasobra fundacion lo a cumpli cu su trabao debidamente y esaki lo tin e efecto cu e memoria di Betico lo keda demasiado presente den nos pueblo pa cierto integrantenan den MEP cu ta biba ta envidia mi tata".

Segun Glenbert Croes, con por ta cu gobiernu cu a proclama Betico Croes como libertador di Aruba, ta tuma venganza contra e yunan cu el a laga na mundo. E partido cu Betico Croes a funda, ta hiba un campaña sushi contra su yunan y contra nan sra. mama. E partido cu Betico a funda, ta rechasa entrada di e yiu homber mayor cu ta aspira di sigi pasonan di su difunto tata.

"Digno pueblo di Aruba, lo unico cu por worde conclui ta: e masterplan cu a worde publica den medionan di comunicacion no a usa e frase correcto. No ta horta nan kier horta MEP, ta caba nan kier caba cu tur loke ta pone nan y nos pueblo corda riba mi tata.

Despues cu Betico a muri, el a laga 4 criatura atras cu lo haci todo por todo pa no laga ningun hende destrui e imagen di nan tata. Y awe su 4 criaturanan ta para cla pa

bringa tur e mediocrenan cu ta yama nan mes leal na e memoria di Betico Croes, mientras cu e regimen nobo den MEP kier destrui, caba y mata tur loke mi tata a laga tras pa awe cu pueblo di Aruba a duna nan e oportunidad solamente pa memoria di Betico Croes, e partido cu el a funda cu el a duna su bida pé, ta bira lomba pa su memoria y su famia".

Segun Glenbert Croes, e mensahe di su rumannan, di su mama y di dje mes, ta manda na henter pueblo, cu si Fundacion Betico Croes no tin balor mas pa gobiernu di MEP, anto MEP siendo e partido cu nan tata a fundá, no tin razon mas pa existi.

E mes, den su funcion como presidente di OLA lo propone na dirigientenan di partido, cu parti di e fondonan cu OLA recibí pa campaña, bai destina pa salba Fundacion Betico Croes. □